

Íslenskir Aðalverktakar HF
Haukur Magnússon
Suðurlandsbraut 24
108 Reykjavík

2000100107
1604; 9310

Reykjavík, 8. desember 2000
/--

Efni: Alifuglasláturhús að Völuteig 2 í Mosfellsbæ. Ákvörðun um matsskyldu.

Vísað er til erindis Íslenskra Aðalverktaka hf. dags. 16. október 2000, mótttekið 30. október 2000 og viðbótargagna dags. 16. nóvember 2000 þar sem samkvæmt 6. gr. laga nr. 106/2000 um mat á umhverfisáhrifum er óskað eftir ákvörðun Skipulagsstofnunar um matsskyldu kjúklingaafurðarstöðvar að Völuteig 2 í Mosfellsbæ.

Skipulagsstofnun leitaði álits Mosfellsbæjar og Heilbrigðiseftirlits Kjósarsvæðis og barst álit frá Mosfellsbæ með bréfi dags. 23. nóvember 2000 og tölvupósti dags. 8. desember 2000 og Heilbrigðiseftirliti Kjósarsvæðis með bréfi dags. 15. nóvember 2000. Frekari upplýsingar bárust frá framkvæmdaraðila í kjölfar umsagna með símbréfi dags. 29. nóvember 2000.

Fyrirhuguð framkvæmd samkvæmt framlögðum gögnum framkvæmdaraðila

Framkvæmdin felst í byggingu kjúklingaafurðarstöðvar sem er með sláturhús fyrir um 15.000 fugla eða um 18 tonna framleiðsla á sólarhring. Mannvirkið verður um 4.900 m² og stendur á um 13.000 m² lóð að Völuteig 2 í Mosfellsbæ. Lóðin er í iðnaðarhverfi og eru um 160 metrar í næstu íbúðarhús. Framkvæmdir eru hafnar á lóðinni í samræmi við samþykktar byggingarnefndarteikningar.

Frárennsli frá slátur- og afurðastöðinni verður dælt í hreinsikerfi með bestu fáanlegri tækni sem byggir á fínsíum og síðan uppdrifs- og fleytibúnaði (dissolved air flotation). Ef nauðsynlegt reynist er hægt að hreinsa frárennslið enn frekar af lífrænum úrgangi. Miðað er við að allur sláturúrgangur fari til Kjöttmjöls til endurvinnslu en annar úrgangur fari til Sorpu. Næstu vikur og mánuði verði áfram unnið að fráveitu og úrgangsmálum í samráði við Heilbrigðiseftirlit Kjósarsvæðis og tæknideild Mosfellsbæjar þannig að þau mál verði í ásættanlegu fyrirkomulagi áður en stöðin hefur rekstur. Það er niðurstaða framkvæmdaraðila að framkvæmdin skuli ekki háð mati á umhverfisáhrifum.

Álit umsagnaraðila

Heilbrigðiseftirlit Kjósarsvæðis bendir á að fráveita frá afurðarstöðinni verði leidd í Varmárþró en frárennsli hennar endi í Varmá og sé áin menguð af skólpi. Rotþróin sé ekki í stakk búin til að taka við fráveituvatni frá afurðarstöðinni og því sé nauðsynlegt að fráveituvatnið verði hreinsað eins og frekast er unnt. Setja þurfi upp fullkominn hreinsibúnað þar sem til viðbótar sé beitt efnafræðilegri meðhöndlun. Jafna þurfi frárennslið frá afurðarstöðinni í fráveitukerfið til að koma í veg fyrir útskolunaráhrif í Varmárþró og mengunarpúlsa í viðtaka. Bent er á að þrátt fyrir efnafræðilega meðhöndlun á skólpi frá afurðarstöðinni muni mengun í Varmá aukast a.m.k. um helming miðað við COD gildi.

Í umsögn heilbrigðiseftirlits Kjósarsvæðis kemur fram að í ljósi þess að óásættanlegt sé að mati heilbrigðiseftirlitsins að fráveita afurðarstöðvarinnar fari þessa leið hafi bæjaryfirvöld í Mosfellsbæ gert ráðstafanir til þess að flýtt verði lagningu á skólplögn frá útrennsli Varmárþróar í útrennsli Holtahverfisþróar. Þessi ráðstöfun yrði til þess að skólpið yrði leitt út fyrir friðlýst svæði Varmárbakka. Mosfellsbær hafi gert áætlun um að ganga þannig frá fráveitu bæjarins að hún uppfylli reglugerð nr. 798/1999 um fráveitur og skólplögn innan þriggja ára. Ef af einhverjum ástæðum þyrfti að leiða skólplögn frá afurðarstöðinni í Varmá sé æskilegt að gerð yrði könnun á áhrifum skólpsins á Varmá og að leitað yrði álits Náttúruverndar ríkisins á framkvæmdinni. Heilbrigðiseftirlit Kjósarsvæðis telur ofangreinda framkvæmd ekki matsskylda.

Mosfellsbær bendir á í umsögn sinni að Heilbrigðiseftirlit Kjósarsvæðis muni setja kröfur varðandi loftmengun og mengun í fráveituvatni í starfsleyfi. Greint er frá því að til standi að leggja ræsi frá Varmárþró í útrás sem liggur í Leirvog og stefnt að framkvæmdum á næsta ári og muni þá Varmá ekki verða viðtaka. Framkvæmdin og starfsemi sem henni fylgi brjóti ekki í bága við skipulagsáætlanir Mosfellsbæjar. Það er mat Mosfellsbæjar að ofangreind framkvæmd skuli ekki háð mati á umhverfisáhrifum.

Í frekari upplýsingum framkvæmdaraðila kemur fram að áfram verði unnið að fráveitu og úrgangsmálum í samráði við Heilbrigðiseftirlit Kjósarsvæðis og Mosfellsbæ, þannig að þau mál ásamt öðrum er varða byggingu, frágang og rekstur sláturhússins verði í ásættanlegu fyrirkomulagi áður en stöðin hefur rekstur.

Niðurstaða Skipulagsstofnunar

Um er að ræða kjúklingaafurðarstöð með sláturhús fyrir um 15.000 fugla eða 18 tónna framleiðsla á sólarhring sem samkvæmt 6. gr. og lið 7. f. í 2. viðauka í lögum nr. 106/2000 um mat á umhverfisáhrifum ber að tilkynna til Skipulagsstofnunar til ákvörðunar um matsskyldu.

Í umsögnum kemur fram að ekki sé nauðsynlegt að fram fari mat á umhverfisáhrifum framkvæmdarinnar en bent er á mikilvægi þess að flýta lagningu skólplagnar frá útrennsli Varmárþróarfráveitu í sjó. Skipulagsstofnun telur að fullnægjandi upplýsingar varðandi mengun vegna frárennslis frá fyrirhugaðri framkvæmd og starfsemi sem henni fylgir liggi nú þegar fyrir og mat á umhverfisáhrifum muni ekki skýra þann þátt frekar. Stofnunin beinir því

til sveitarstjórnar og heilbrigðisyfirvalda að tekið verði á hreinsun fráveitu í starfsleyfi á ásættanlegan hátt áður en rekstur stöðvarinnar hefst. Samráð verði haft við Náttúruvernd ríkisins við gerð starfsleyfis.

Í samræmi við 6. grein laga um mat á umhverfisáhrifum nr. 106/2000 hefur Skipulagsstofnun farið yfir þau gögn sem lögð voru fram af hálfu framkvæmdaraðila við tilkynningu. Á grundvelli gagna framkvæmdaraðila og að fengnu áliti Mosfellsbæjar og Heilbrigðiseftirlits Kjósarsvæðis er það niðurstaða Skipulagsstofnunar að kjúklingaafurðarstöð að Völuteig 2 í Mosfellsbæ skuli ekki háð mati á umhverfisáhrifum vegna eðlis framkvæmdarinnar, staðsetningar hennar og eiginleika hugsanlegra áhrifa framkvæmdarinnar.

Samkvæmt 6. grein laga nr. 106/2000 má kæra ákvörðun Skipulagsstofnunar til umhverfisráðherra. Kærufrestur er til 8. janúar 2000.

Hólmfríður Sigurðardóttir

Afrit: Umhverfisráðuneytið, Mosfellsbær, Heilbrigðiseftirlit Kjósarsvæðis.